



Komunikadu Imprensa
23 Novembru 2016
Parlamentu Nasional

JSMP Preokupa ho dixiplina no pontualidade membru deputadu sira iha sesaun plenaria

JSMP preokupa ho kestaun dixiplina no pontualidade membru deputadu sira iha sesaun plenaria Parlamentu Nasional.

“JSMP lamenta no konsidera atitude sira hanesan ne’e la kontribui ba prátika di’ak hosi instituisaun sira Estadu nian no la hatudu responsabilidade nu’udar representante povu iha Uma Fukun Parlamentu Nasionál hodi diskute no hakotu asuntu sira ba interese nasionál nian,” dehan Diretór Ezekutivu JSMP, Luis de Oliveira Sampaio.

Tuir agenda Plenaria Parlamentu Nasionál Nú. 354/III, Tersa-feira, 22 Novembru 2016, konstitui agenda importante lubuk ida ne’ebé presiza diskute no aprova. Agenda sira ne’ebé plenaria konsege diskute no aprova mak: 1) Proposta Rezolusaun Nú. 20/III (4a) ne’ebé aprova adezaun ba Konvensaun ne’ebé aprova Konstituisaun Organizaun Nasoins Unidas ba Edukasaun, Siénsia no Kultura, 2) Proposta Rezolusaun Nú. 16/III (3a) ne’ebé aprova adezaun ba Konvensaun Internasionál Kontra Dopajen iha Desportu Organizaun Nasoins Unidas nian ba Edukasaun, Siénsia no Kultura, 3) Projetu Rezolusaun Nú. 32/III (5a) kona-ba apoiu ba Governu iha desizaun identifikasaun objetu dezvoltamentu sustentável nú. 2 (eradikasaun hamalaha) hanesan prioridade ba 2017 no haforsa medida sira ba asegura alimentasaun ne’ebé saudável no nutrisaun di’ak.

Ajenda sira plenaria nian ne’e importante tebes tanba konstitui asuntu sira ne’ebé relevante no prioridade ba interese nasionál ne’ebé sai nu’udar responsabilidade Parlamentu Nasionál nian hodi diskute no aprova. Mezmu nune’e, porsentajen deputadu sira ne’ebé la marka prezensa boot tebes. Entre 40% & 45% mak la marka prezensa iha diskusaun no votasaun ba rezolusaun sira ne’e.

Aleinde prezensa, pontualidade no dixiplina deputadu sira balun nian mós preokupadu tebes. Deputadu balun la tama tuir oras ka puntuál no balun mezmuke plenaria hahú tiha ona sei la’o sai tama no balun fali mezmuke Prezidente Meja hahú ona dirije votasaun, sei sai hosi plenaria no la partisipa iha votasaun.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Iha JSMP nia relatóriu anuál kona-ba “Programa Observasaun Parlamentár” tinan 2015 no tinan sira antes, JSMP subliña preokupasaun sira kona-ba deputadu sira nia prezensa no diplina durante plenaria sira. Infelizmente, esperensia ne’e kontinua eziste mesmu atu tama ona períodu lejislativu datoluk nia rohan.

Realidade ida ne’e rezulta mós variasaun iha total número votu hosi 39 ba 36 iha votasaun ida ikus ba Projetu Rezolusaun Nú. 32/III (5a).

Rezultadu votasaun ba rezolusaun sira ne’e liu ho unanimidade. Proposta Rezolusaun Nú. 20/III (4a) liu ho 39 votu afavór, kontra no abstensaun ho 0 votu. Proposta Rezolusaun 16/III (3a) liu ho 36 votu afavór, kontra no abstensaun ho 0 votu.

JSMP enkoraza membru deputadu sira nu’udar representante povu iha uma fukun Parlamentu Nasional bele sai instituisaun ezemplar ba instituisaun publiku sira seluk no bele iha autoridade moral suficiente hodi kontrola no supervizona instituisaun publiku sira seluk.

Atu hatene informasaun liutan bele kontaktu:

Luis de Oliveira Sampaio
Diretór Ezekutivu JSMP
Direasaun e-mail : luis@jsmp.minihub.org